



МЕСЯЦА ОКТЯБРЯ В 15-Й ДЕНЬ

**Преподобнаго отца нашего Евфимия Новаго
и святаго преподобномученика Лукиана,
пресвитера Великия Антиохии**

На Господи, воззвах: стихиры преподобнаго,
глас 4.

Подобен: Яко добля:

Тесный путь шествовал еси, / нево́лненным
духом / к жизни веду́щим препла́вая: / постников
бо ты был еси хвала, Евфимие, / терпеливно
низложив демонская ловления, / тем получил еси
Небеснаго Царствия наследник быти / и не пре-
стаю́щая наслаждаешься красоты́.

Пресветлое житие твое Ангелы удивí / и де-
монская свирéпства я́ве устраши, / верных же
собрания свéтло украсí, / к Небесному Христóву
жилищу / повелевая шéствовати всегда. / Егоже
моли от тли и бед избавитися / верою творящим
всечестную память твою.

Песнопение и хвалу / Христу приносил еси на
всяк день, отче, / в пустыни жíтельствуюя, /
Единому Богу возложив душу и помышление, /
яко великий Моисей, в нехóдная вшел еси: / тем
победив невидимаго врага, / и был еси чистое
приятелище / и Божественнаго Духа оргán.

Ины стихиры мученика, глас тойже.

Подобен: Дал еси зна́мение:

Словом Божественнаго знания, / обогатéв ве-
рою, верныя утвердил еси / многоплетéнные

муки / и ярость мучительскую терпéти дерзостно /
будущия ради жизни и нетленныя радости. / Тем
тя ублажаем, Лукиáne достославне, / и Божест-
венное твое днесь совершаем торжество.

Темницу многоврéменную / и нўжнейшую
смерть претерпел еси, преподобне, / ўзами связў-
ем, и острыми чрепíнами стрещаем, блаженне, / и
неядéнием лютым, и долготною жаждою
утомляемь; / тем тя Небесная пища яве приýла
есть, / яко непобедíма мученика, страсготерпче
дóблий.

Нéдро тя морское приём, славне, / по трíдеся-
тих днех сўши предаёт, / якоже Иóну древле
зверей служением, / к Богочéстному погребéнию, /
и исцелений Божественное источéние, / мучени-
ков начальное избрание, Церкви утверждéние, /
молитвенниче о душах наших, / Богоносне пребо-
гате.

Слава, глас 6:

Преподобне отче, / во всю землю изыде вещá-
ние исправлénий твоих; / тем на Небесéх обрел
еси мзду трудов твоих, / дéмонския погубил еси
полкí, / Ангельския же постíгл еси чíны, / ихже
житию непорочно подражал еси, / дерзновение
имея ко Христу Богу, / мир испроси душам
нашим.

И ныне, Богородичен или Крестобогородичен.

Подобен: Трдневен:

Вíдящи Тя распинаема, Христе, / Тебе
Рождшая вопияше: / что стрáнное еже вижу
та́инство, Сыне Мой? / како на Древе умираеши,
плотию повéшен, / Жизни Подателю?

На стиховне Октоиха. Слава, глас 5:

Преподобне отче, / не дал еси сна твоим
очесём, / ни вéждом твоим дремáния, / дóндеже
душу и тело от страстей свободíл еси / и себе
уготовал еси Духа жилище; / пришед бо Христос
со Отцем, обíтелище в тебе сотвори, / и Едино-
сўщней Троице угодник был еси, / великопропо-
вэдниче Евфимие, молися о душах наших.

И ныне, Богородичен или Крестобогородичен.

Подобен: Радуйся:

**Агница Своего Агница / иногда зрящи, к зако-
лению тщащася, / усердно последоваше, сия во-
пиющи Ему: / како идещи, Чадо Мое Сладчайшее,
Христе? / чесо ради скорое течение сие, Долго-
терпеливе, течещи неленостно? / Иисусе Возже-
леннейший Безгрешне, Многомилостиве
Господи, / даждь Ми слово, Рабэ Твоей, / Сыне
Мой Вселюбезнейший, / не презри, Щедре,
молча, / Тя странно Рождшую, Боже Всещедре, /
даруяй миру велию милость.**

Тропарь, глас 8:

**В тебе, отче, известно спасесея, еже по
образу: / прием бо крест, последовал еси
Христу, / и, действуя, учил еси презирати убо
плоть, преходит бо, / прилежа́ти же о души, ве́щи
безсмертней; / темже и со Ангелы срадуется,
преподобне Евфимие, дух твой.**

Слава, мученика, глас 4:

**Воздержанием постничества и мучения
крóвию / ты, стяжав венец неувядаемый, священ-
номучениче Луки́ане, / Антиохийская похвало́, / о
нас моли Христа Бога, / творящих святую память
твою.**

И ныне, Богородичен.

НА УТРЕНИ

Канон Октоиха един и святых два.

**Канон преподобнаго, глас 2, егоже краегранесие: Радуйся,
Божественная монашествующих славо.**

Песнь 1

**Ирмос: Грядите, людие, поим песнь Христу Богу, /
раздѣльшему море и наставльшему люди, / яже изведе́ из
работы египетския, / яко просла́вился.**

**Радуйся, источниче, кипящий струю
спасительную, / от неяже почерпаем вси целеб-
ную благодать прегрешений, / любовьию приходя-
щим тебе, приснопамятне.**

**Святыню прием от Христа Бога, от утробы,
славне, / и явился еси избранный сосуд, / Духа
благодать всю приемы́й, отче Евфимие.**

**Да жизни причастник нетленные явѣшися, /
временныя, отче премудре, небрегл еси: / и Богу**

приступль, непрестанно мóлиши спастися всем нам.

Богородичен:

Глаголу мудрому Твоих устён послéдующе, / радующесея, Пренепорочная, Тя ублажаем, / бывшую нам вину неизреченнаго блаженства.

Ин канон мученика, глас 4, егоже краегранесие: Твою, Лукиане всеблаженне, пою славу. Творение Иосифово.

Песнь 1

Ирмос: Воспою Тебе, Господи Боже мой, / яко извел еси люди из работы египетския, / покрýл же еси колесницы фараоновы и силу.

Мудростию, и благодатию, и силою духовною, Лукиане, возсияв, / просветил еси люди: / и к познанию Христову, мучениче, наставил еси.

Оружием благоверия тя защитív, / иже немощь нашу Понесýй яко благоутробен, / непобедима соде́я тя, врагов, мучениче, борéнием.

На высоту Небесную во глубинú зловерия, страдальче, / пáдших возвлекл еси / мрéжами Божественных твоих глагол, досточúдне.

Богородичен:

Слово Присносущное Отчее / словом, паче вины и слова, без семене зачала еси, Чистая, / и родила еси в наше избавление.

Песнь 3

Ирмос: На камени мя веры утвердív, / разширýл еси уста моя на враги моя. / Возвесели бо ся дух мой, внегда пети: / несть свят, якоже Бог наш, / и несть праведен, паче Тебе, Господи.

Всесветлый показался еси, Богомудре, столп, / наставляя чýны монашествующих, / облак же, осеняющъ жребий Божий, / лица невидимых врагов помрачающъ благодатию Всецаря.

Стойши пред лицом твоего Владыки, неослабным мановением моляся / избавитися стаду твоему от работы тьмы, преподобне, и мучительства страстей, / и твоих молитв послушает Бог.

Плоти твоя двизáния умертвív крепким пощéнием, Богоглагóльниче, / был еси обителище Владыки. / Егоже умоли избавитися скорбей и страстей смущения к тебе прибегающим.

Богородичен:

Свѣток Тя провидѣ Исаия, в немже плѣтски Слово знаменася, / раздрав начертание перевозданнаго, еже преступлением подписа, / и подаде оставление работы нам.

Ин

Ирмос: Лук сильных изнеможе / и немощствующи препоясашася силою; / сего ради утвердися в Господе сердце мое.

Дом добродетелей свѣтлостію, мучениче, / душу твою Богу совершил еси / и идольския храмы молитвою твоею разорил еси.

Воспевал еси, напастыми окружаем, мучениче, / и мучений болѣзнями оскорбляем, / таковых яко Благодетеля благих сподобльшаго тя.

Тело мукам предав, мучениче, / душу твою неблаженно соблюл еси: / жертву непорочну Владыце, ты самаго, принесл еси, всечестне.

Богородичен:

От Девы Младенец раждается, содетельствовавый веки хотением, / Юже воспеваем яко Богородицу и праведно ублажаем.

Кондак мученика, глас 2.

Подобен: В молитвах:

В пощении पहले просиявшаго, / и во страдании второе светяща, / вси, яко светило пресветлейшее, / Лукиана песнями славно почтим, / молящаго непрестанно о всех нас.

Ин кондак мученика, глас 4.

Подобен: Вознесыйся:

Яко святитель благочестно пожив / и священномучения венец прият, / идольския жертвы погасил еси, / добрый пастырь Христову стаду бысть, премудре Лукиане. / Сего ради ты почитаем, песнями вопиюще: / от бед избави нас присно молитвами своими.

Седален преподобнаго, глас 8.

Подобен: Премудрости:

Отрѣкся плоти Христа ради / и духовный явився народоводитель, / услышал еси словеса тайных учений; / монахов же явился еси правило правости / и страсти вся крепко попрал еси. /

Тем и демонов коварство до конца испепелил еси;/ к Нему зря всегда, Богоносе Евфимие,/ моли Христа Бога грехов оставление даровати/ чтущим любовь святую память твою.

Слава, седален мученика, глас тойже:

Благодати словом верных умащяя сердца, мучениче Лукиане,/ страдати устроил еси и побеждати мучителя:/ и добре совершив течение Божественное,/ и по конце славы мучеников сподобился еси./ Тем сошедшеся, святое твое вси почитаем скончание,/ Спаса прославляюще:/ страсотерпче прехвальне,/ моли Христа Бога прегрешений оставление подати/ чтущим любовь святую память твою.

И ныне, Богородичен:

Солнца облаче разумнаго,/ Божественнаго Света, светильниче златокованный, Нескверная, Неблзная, Всенепорочная Владычице,/ омраченную душу мою ослеплением страстей,/ безстрастия зарею просвети, молюся,/ и оскверненное мое сердце омий потоки умиления, покаяния же слезами/ и от тимения мя очисти дел моих, да любовь зову Ти:/ Богородице Приснодево, моли Христа Бога прегрешений оставление подати ми,/ Тебе бо имею надежду, раб Твой.

Крестобогородичен:

Агница, и Пастыря, и Избавителя/ Агница зрящи на Кресте, восклицаше, плачущи,/ и горько рыдаючи, вопияше:/ мир убо радуется, приемляй Тобою избавление,/ утроба же Моя горит, зрящи Твое распятие,/ еже терпиши за милосердие милости./ Долготерпеливе Господи, милости бездно и источниче неисчерпаемый,/ умилосердися и даруй согрешений оставление/ верою поющим Божественныя Страсти Твоя.

Песнь 4

Ирмос: Пою Тя, слухом бо, Господи, услышах и ужасохся,/ до мене бо идиши, мене ища заблуждшаго./ Тем многое Твое снизхождение, еже на мя,/ прославляю, Многомилостиве.

Желание Божественное ты распали, разгревав твое сердце,/ и желанная постигл еси до конца,

Богомудре отче, / оставль земных пристрастие, /
единосельник Вышних быв служителей.

Ласкания сопружницы, преподобне, попра́л
еси всеобразно; / вни́де бо раче́ние Содетеля в тя,
Богомудре, тепле, / и содеянных мрачная жела-
ния до конца отрину.

На па́жить ч́исту возгна́л еси воздержания
стадо твое, отче, / и ко источнику привел еси то́е
нему́тному безстрастия, / мысленныя зvéри
побеждая, / еже и ныне молитвами твоими
спаса́й.

Богородичен:

Се Тебе роди славят родов, якоже прорекла
еси, Отроковице: / Создателя бо была еси палата
и Божественный храм, / в немже вселися Высо-
чайший, плотию обложся, / да спасет нас.

Ин

Ирмос: Седя́й в славе на Престоле Божества, / во
о́блаце лёгце, / при́де Иисус Пребожественный / нетлён-
ною длáнию и спасе́ зовущия: / слава, Христе, силе Твоей.

Кре́пок на прелесть явился еси, блаженне, / и
многим обучитель к Божественным подвиго́м
всегда; / терпением же мук некрепкую смирил
еси, мучениче, крепость гордаго.

Распростёрт на древе, и ремением
растяга́емь, / и гладом и жа́ждею многовре́менно
умуча́емь, / и тонкими чрепíнами настрекáемь, /
претерпел еси, мучениче Христов достославне.

Закон Божественный пропове́дая, беззаконну-
ющих обратíл еси / и испíти усердно чашу
мучения показал еси; / с нимже в Божественныя
дворы́ вселился еси, насыща́ясь древа жизни, /
всеприснопамятне.

Богородичен:

Из утробы Твоя возсия́в Божественное
Солнце, / яже во тме многобожия, Отроковице,
просветí / и в сени смёртней сущия осия́. / Ему́же
взываем: слава, Христе, силе Твоей.

Песнь 5

Ирмос: Просвеще́ние во тьме лежа́щих, / спасение
отчаянных, Христе Спасе мой; / к Тебе у́тренюю, Царю
мира, / просветí мя сиянием Твоим; / иного бо, разве Тебе,
бога не знаю.

Весь Богу прилежá, отче, / в пустынях мраз
нощнѣй претерпел еси дóблественне, / и дневнѣй
носá вар; / и был еси дом мудрости Божия /
добродетельным сиянием многообразно украша-
ем.

Юношески наступѣв на пощѣние, / чревоней-
ствования змѣя не приѣм советника, отче, / но
áлчбою, и молитвами непрестáнными, / и чисто-
тѣю соединѣвсь Богу, / причастник был еси слá-
дости лучшия.

Добродетелей возшѣд на óблаки, / скрижáли
приял еси, блаженне, написанныя рукою
Божиею, / и монашествующих множества научил
еси / вещественных всех ошáются, / возводá на
гору Божественнаго познания.

Богородичен:

Явилася еси, Чистая, Богопрáотцу лествица
небесé высочáе, / имущи Создателя сидяща. / Из
Тебе бо Бог, воплощся, показася и совокупѣ
разстоящаяся прѣжде. / Тем Тя Богородицу вер-
нии славим.

Ин

Ирмос: Нечестѣвни не úзрят славы Твоея, Христе, / но
мы Тя, Единорóдне, / Отеческия славы сияние Божества, /
от нѣщи úтреннююще, / воспевáем Тя, Человеколюбче.

Пожѣг, преподобне, тѣрние страстей пѣтом
пощѣний, / струя́ми погасил еси трудов твоих /
нечестия пещь доблемысленне, / всеблаженне.

Непрекλόнен, облага́ем частыми болѣзньми,
пребыл еси, / к Богу взирая, свѣте, спасти
могущему, / Емуже в рúце преложил еси духа
твоего, веселя́ся.

Удалѣвшися Бога обличал еси зловѣрныя, / и,
долгими болѣзньми и лѣотыми, славне, окружаемь,
Христу приближился еси, / Егоже страсть изоб-
разѣл еси.

Богородичен:

По рождестве нетлѣнна пребыла́ еси,
Чистая, / и тления род человеческий, яко Бога
Рождшая, свободила́ еси; / сего рáди верою Тя
православно ублажаем.

Песнь 6

Ирмос: Ко Господу от кита Ибна возопи:/ Ты мя возведи из глубины ада, молюся;/ да яко Избавителю, во гласе хваления,/ истины же духом пожру Тебе.

Пострекаемь Владычнейю любовию,/ оставил еси вся чувственная/ и Тому последовал еси,/ на рамена иго легкое взем мужески благодушия,/ тезоимените.

Наказан неизреченных знанию, блаженне,/ научил еси твое стадо Небесная мудрствовати/ и страстей нашествия отгоня твоими поученьми.

Житие твое подобно Вышних сил, отче, бысть,/ дерзновение тебе даде, еже держал еси всегда,/ страстей избавити твое стадо Христа умоли.

Богородичен:

Разумев Твое неизреченное, Чистая, тайнство,/ гору приосененную Аввакум Тя провозвестит;/ из Тебе бо Содетель за милосердие воплощся,/ древнее отъят изречение.

Ин

Ирмос: Пожру Ти со гласом хваления, Господи,/ Церковь вопиет Ти,/ от бесовския крове очищшися,/ ради милости от ребр Твоих/ истекшею Кровию.

Немóкренно мучений прешел еси пучину;/ Всесильною же десницею/ от глубины тело твое спасено бысть,/ любящими тя, невредно, Богоблаженне, видимо.

От китова чрева Иону Избавивый триднэвновавша,/ спасает и ты глубины морския,/ служащим морским зверем,/ по днех тридесятих.

Любовию Христовою распалюемь, славне,/ до смерти противостал еси мучителей, всемудре;/ сего ради Царствия Небеснаго сподобился еси, веселяся.

Богородичен:

Чистую Тя Голубицу и Едину Нескверную/ Пречистое обрете Слово/ и от Тебе родитися благоволи, Пресвятая Богомати,/ Всенепорочная Дево.

Кондак, глас 2.

Подобен: Вышних ища:

Волнѣний множества невлѣжно преходя, / безплѣтныя врагѣ струями слез твоих / крепко погрузил еси, / Богомудре Евфимие преподобне: / и, чудес дар прием, / исцеляеши страсти всякия, / моли непрестанно о всех нас.

Икос:

Отверзи моя уста, треблаженне, / благоприятными твоими молитвами предстою Богу, всеславне Евфимие: / да воспую Божественное твое житие и возглаголю достойно добродетели твоя, / яже на земли Христа ради Бога совершил еси преподобно. / Столп бо явился еси и правило монахов светлейшее, равноангельное стяжав житие, / в неходная истинно вселивсь, моли непрестанно о всех нас.

Песнь 7

Ирмос: Купина в горѣ огнѣнеопальная / и росоносная пещь халдейская, / яже предписа Тя, Богоневесто; / Божественный бо Невещественный / в вещественном чреве Огнь неопально прияла еси. / Темже из Тебе Рождшемуся / поем: благословен еси, Боже отец наших.

Авраамский стяжав нрав, премудре, / от земли твоя пресельник быв, / и Бога узрел еси, обещающая ти воздаяние богато. / Тем, веселясь, усердно пел еси: / благословен еси, Боже отец наших.

Распалѣем духом, преподобне, / козни вражия разорил еси / и победы одоления взял еси, / оружием огражден нас ради пригвоздившагося на Кресте Владыки /. Тем, веселясь, усердно пел еси: / благословен еси, Боже отец наших.

К горѣ молитвы приступил еси, / и, вшед во облак Духа, Божия задняя видел еси, / и, славу прием разсуждения, быв, отче, столп непоколебим. / Тем прилежно моли избавитися искушения вражия поющим тя.

Богородичен:

Закона Исполнителя родила еси, / прежде век Господа всяческих, / Сына, Мудрость же и Силу, / напоследок, Пречистая, преестественно плотию на обновление земным. / Тем благочестно, Дево

Чистая, / благословен, из Тебе Рождшемуся зовем, Боже отец наших.

Ин

Ирмос: Спасый во огни Авраамския Твоя отроки, / и халдеи убив, / яже правда праведно уловляше; / препетый Господи, / Боже отец наших, благословен еси.

Стремления глагол твоих мудрых, мучениче, / гонитель, не терпя, / умерщвляет тя, / и во глубинну морскую пометает, / Горнее ходатайствуя тебе, яко недоумевая, Царствие, доблемудре, / и Божественную славу.

Не поклонився истуканным, колена же не поклонив идолом, / во огонь ввержен скорбей, в печь мучительную вшел еси, / орошаемъ Духом, росодательною силою, / Богомудре мучениче.

Умерщвленные и во глубинѣ еллинскаго безбожия пожрѣнныя люди, / живоносными твоими словесы извлѣкл еси, песнопоя, досточудне: / препетый Господи, Боже отец наших, благословен еси.

Богородичен:

Благословен Плод благословеннаго чрева Твоего, / Егоже благословятъ Небесныя силы и земных собори, / нас Избавльшаго клятвы древния, Благословенная.

Песнь 8

Ирмос: В печь огненную, ко отрокомъ еврейскимъ снишедшаго / и пламень в росу преложшаго Бога, / пойте дела яко Господа / и превозносите во вся веки.

Слез твоих теченьми огнепальныя сласти испепелил еси, / геенскаго пламене страх отгнал еси, отче мудре, / совершенною любовью Создателя твоего срастворився страхом, / во вся веки.

Якоже Енох к Богу преставлься, от Него прият был еси, отче, / и, с Вышними лики водворяяся, поѣши: / вся дела Господа пойте / и превозносите во вся веки.

Ныне нетленных даровъ наслаждаяся и трисолнечныя свѣтлости исполняяся, блаженне, / певцы твоя страстей и тмы молитвами избави, / да достойно Христа славословим.

Богородичен:

Клятву разрешила еси древнюю, Пречистая, земных, / неизреченным словом Бога зачѣнши, / воплощенна из Тебе за милосердие, Пренепорочная Владычице. / Егоже превозносим во веки.

Ин

Ирмос: **О**троки благочестивыя в пещи / Рождество Богородичо спасло есть; / тогда убо образуемое, / ныне же действующее, / вселенную всю воздвизает пети Тебе: / Господа пойте дела / и превозносите Его во вся веки.

Гладом мысленным истаявшия хлебом словес твоих утвердил еси / Единого чествовати Господа, Хлеб жизни нашея, наказав, славне. / Емуже вси поим: / Господа воспевайте дела / и превозносите во вся веки.

Поправ лютая кознодейства врага прелестника страданием твоим, / взялся еси на преславную высоту, достославне, / и Ангельския достигл еси чины, вопия: / Господа воспевайте дела / и превозносите Его во вся веки.

О, странных вещей совершившихся на тебе, Лукиане терпеливейше; / недра бо морское тело твое святое на довольно приемь, не вреди е, / суши же предаёт цело, / струй исцелений точаще любящим тя.

Богородичен:

И языком, Дево, и сердцем Чистую Богородицу Тя проповѣдаем, / Господа бо родила еси, плотию обложена и во дву естеству разумеваема; / Егоже вся силы Небесныя славословят во вся веки.

Песнь 9

Ирмос: **О**т Бога Бога Слова / неизреченною мудростию пришедшаго обновити Адама, / ядию в тление падшаго лоте, / от Святыя Девы неизреченно воплотившагося нас ради, / вернии единомудренно песнями величаем.

Просвещен добротою постничества, отче, / и одѣян ризою нетления, Евфимие, / и увязен венцем даров паче ума, / Владыце всех предстоиши, радуяся.

В пребывалища присноживущая вселился еси, блаженне, / идеже апостол собор и множество мученик, преподобных собрание, пророков

лицы,/ болезней воздаяния от Бога прием
достоино,/ Богомудре достославне.

**Всесвѣтел, Богоглаго́льниче, был еси,/ заря́ми
Света Трисолнечнаго свѣтло озаряе́мь,/ испроси
прегрешений разрешение,/ лютых избавление и
злых отчуждение / всем, любовью к тебе притека-
ющим.**

Богородичен:

**Воплотився неизреченно Владыка всех из Те-
бе, Богородительнице Марие,/ совершен бысть
Человек,/ и, родився, якоже прежде рождества
Деву сохрани Тя Чисту./ Егоже моли спасти от
бед души наша.**

Ин

**Ирмос: Ева убо недугом преслушания / клятву вселила
есть;/ Ты же, Дево Богородице,/ прозябением чревоноше-
ния мiрови благословение процвела еси;/ тем Тя вси
величаем.**

**Свѣтится, мудре, священная твоя память,/ за-
рями Духа облак страстей разгонящи,/ просве-
щающи же верных собрания и пожигающи де-
монская воинства;/ юже совершающия ны сохра-
най.**

**Разрешился еси от телесных уз, блаженне,/ и
к высотѣ небесней, радуясь, возлетѣл еси,/ и
явился еси красен язв удобреньми Богу Творцу;/
Емуже предстоиши с мученики, веселяся.**

**Мученик нас Лукиан совокупѣ / похвалити
того страсти днесь, и светлыя подвиги,/ и еже до
конца доблесть, чудес же благодать обильную./
Сего вси согласно ублажаем.**

Богородичен:

**Мудрости вместилище, паче ума лучшия, яви-
лася еси,/ Отроковице Чистая, одушевленный
Престол же и дверь;/ тем Тя челове́честии собо-
ри и Ангельская славят воинства,/ Едина всех
преиму́щая.**

Светилен.

Подобен: Жены услышите:

**Мирскаго пристрастия яко трудна избѣгл еси/
и неядением плоть увядил еси;/ обновив же
душевную крепость, преподобне,/ и славою обо-
гатился еси Небесною, приснопамятне./ Тем мо-
ляся не преста́й о нас ко Господу.**

Слава, и ныне, Богородичен:

Ужасно Твое предстательство, Марие Богоукрашенная, / и страшная Твоя слава всей земли, Богородице; / в Тебе бо ныне хва́лимся и Тя Ходатаицу иму́ще к Сыну и Создателю Твоему, / неусыпную Твоею молитвою да спасем-ся вси.

На стиховне Октоиха. Слава, глас 2:

Преподобне отче, / из младѣнства добродетель прилежно испр́авив, / орѓан был еси Святаго Духа; / и от Того приѣм чудес дѣйство, / увещ́ал еси человеки преобидети слáдкая; / ныне же Божественным светом чистѣе облист́аем, / просвети́ и наша помышления, / отче Евфимие.

И ныне, Богородичен или Крестобогородичен.

Подобен: Егда от Древа:

Дре́ву Крѣстному Тя, Иисусе, / пригвождена, зрящи, Неискусобрачная, / плачущи, глаголаше: / Чадо Сладчайшее, / почт́о оставил еси Мене, Рождшую Тя, ед́ину, / Свете непрístupный Пребзначальнаго Отца? / Потщ́ися и просл́авися, / яко да славу получат Божественную, / иже Божественныя Стр́асти Твоя славящи.

**В
ТОЙЖЕ
ДЕНЬ**



Святителя Ио́анна, епископа Суждальскаго

НА МАЛОЙ ВЕЧЕРНИ

Стихиры, глас 1.

Подобен: Прехвальнии мученицы:

Святителю отче Ио́анне, / твоя священная память верных собрание веселит, / и с теплою верою зывати к тебе научает: / Христа Бога моли даровати душам нашим мир и велию милость.

Святителю отче Ио́анне, / добрая исправления жития твоего поминающих нас, / и та хвалебно воспевающих не презри, егда зываем ти: / Христа моли даровати душам нашим мир и велию милость.

Святителю отче Ио́анне, / смирением стяжав высокая, / и в Небесных вселяясь обителех, при-

ими наше усердное тебе чествование, / и Христа Бога умоли даровати душам нашим мир и велию милость.

Слава, глас 8:

Образ благочестия в житии твоём явил еси нам, / по преставлении же источник исцеления в честных мощах твоих открыл еси нам, / преблаженне святителю Иоанне. / Темже житию твоему подражати ревнующе, молим тя: / Христа Бога моли спасти души наша.

На стиховне стихиры, глас 4:

Презиратель добрых и рачитель горных, / земный Ангел и Небесный гражданин, Иоанне Богомудрый / всех нас праздновати призывает спасительный день к Богу отшествия своего.

Стих: Уста моя возглаголют премудрость / и поучение сердца моего разум.

Божественного Духа исполнен, / Евангельски возлюбил еси люди своя, / милость и благоутробие всем скорбящим отверзая, / и нищим заступник бывая; / тем молимся ти, отче Иоанне, / моли Христа Бога спастися душам нашим.

Стих: Священницы Твои облекутся в правду / и преподобнии Твои возрадуются.

Премирного возжелав Живота, / житие благочестно на земли совершил еси, / егоже ради и Града Небесного гражданин соделался еси; / в нем же помяни, святителю Иоанне, и нас, / совершающих память твою.

Слава, глас 6:

Человече Божий и верный слуга Господень, / сосуде избранный и Царствия наследниче, / не премолчи вопия за ны ко Господу.

И ныне, Богородичен: Богородице, Ты еси лоза:

НА ВЕЛИЦЕЙ ВЕЧЕРНИ

На Господи, возвах, стихиры, глас 6:

Днесь светло красуется благоверный град Суждаль, / торжественно совершающе память твою, чудотворче святителю Иоанне; / темже пречестную твою икону лобезно лобызаем, / и ты песненно восхваляем, / чающе скорое спасение улучшить твоими к Богу молитвами.

Евангельски Бога возлюбив, / и Тому́ всячески добродетельми благоугодити возревновáв, / безконечныя Жизни сподобился еси, блаженне. / Темже с Небесными ныне веселя́ся, святителю Иоанне, / молися Спасу всех избавити нас от всякаго обстояния, / верою совершающих присночестну́ю и святую память твою.

Смирен, незлобив, крóток, / милостив и чист в житии твоём был еси, блаженне; / темже сосуд избрáн явился еси по достоянию, / и великих дарований от Щедродавца Бога сподобился еси, / имиже и нас обогатí, / память твою честно совершающих.

Днесь любовию сошедшеся духовная чада твоя, святителю Иоанне, / преславную память твою светло торжествуем; / просиял бо еси яко солнце свѣтло, светом твоего жития, / и скорый нам помощник явился еси, / избавляя нас от бед и скорбей молитвами твоими.

Слава, глас 8:

Цѣркве Христовы был еси украшѣние, пречúдне, / учением и житием; / ныне же с Гóрними силами радостно ликуя / и дерзновение стяжав ко Господу, / Того прилежно моли спастися душам нашим.

И ныне, Богородичен: Царь Небесный: Таже вход. Прокимен дне. Пармии святительския (зри страницы 135—138)

На литии стихиры, глас 5:

Святителю Иоанне, / преславное житие твое / и учение, апостольскаго духа испóлненное, / благочестие теплое, / кротость же и милосердие славным соде́яша ты на земли / и Небеснаго сподóбиша прославления; / сего ра́ди почитаем ты / и светоносную память твою празднуем благолепно.

Глас 4:

Иоанне преславне, пастырю наш добрый, / утешение скорбящих и недужных врач, / не отвращайся от нас, / но молися за ны, поюция ты.

Глас 5:

Житие совершив непорóчно, отче Иоанне, / и ныне Престолу Господню предсто́я со дерзновением, / дúши верных, приходящих ко свя-

тому твоему гробу, просвещай, / и проси у Господа даровати нам велию милость.

Слава, глас 8:

Образ благочестия в житий твоём явил еси, / по преставлении же, источник исцелений в честных мощах твоих открыл еси нам, / преблаженне святителю Иоанне. / Темже житию твоему подражати ревнующе, молим тя: / моли Христа Бога спасти души наши.

И ныне, Богородичен: Безневестная Дево:

На стиховне стихиры, глас 5:

Радуйся, святителю Иоанне, / светильниче многосветлый граду Суждалю, / и всей стране Российской похвало и утверждение; / святую память твою ныне празднующе, / пречестную икону твою любезно лобызаем, / и оставления грехов просим получитьи, твоими к Богу молитвами.

Стих: Уста моя возглаголют премудрость / и поучение сердца моего разум.

Радуйся, святителю Иоанне, / красотó церковная и благочестия образ! / В незлобии и кротости, / милосердии и чистоте житие твое скончав славно, / на Небеса востéкл еси радуясь; / идéже ликуя со Ангелы в Свете невечернем, / моли Христа Бога, мир миру даровати, / и душам нашим велию милость.

Стих: Священницы Твои облекúтся в правду, / и преподобнии Твои возрадуются.

Радуйся, мúдре Иоанне, / святителей украшение, иноков похвала, / обидимых защищение, сирых отец, / скорбящих утешение! / Светоносную память твою ныне празднующе, молимся тебе: / моли Христа Бога мир миру даровати / и душам нашим велию милость.

Слава, глас 6:

Сраду́йтесь ныне благоверному граду нашему всяк град и страна; / се бо наш предивный врач и заступник, Иоанн великоименитый, / Небеснаго врачества цельбы предлагает всем, / душевное и телесное исцеление подавая паче естества: / егоже приемлюще, славим Христа Бога нашего, / подающаго его ради нам велию милость.

И ныне, Богородичен: Творец и Избавитель:

Тропарь, глас 8:

Православия наставниче, / благочестия учителю и чистоты, / Суждалю пресветлый светильниче, / святителем Богодухновенное удобрение, Иоанне премудре, / учением твоим паству твою просветил еси; / святителю блаженне, моли Христа Бога спастися душам нашим.

Ин тропарь, глас 8:

Управляя Церковь Божию Соборную и Апостольскую, / соблюдая заповеди Божия, / вельми добре упас стадо словесных овец; / зломысленным церковником молитвою своею прозрети повеле, / и научи, якоже прежде святыи Леонтий, / поспешник спасению Русския земли, учитель Ростовский, / прежде связа и паки благослови; / тако святыи епископ Суждальский, / напастем, притекающим к тебе, избавниче, чудотворче Иоанне, / моли Христа Бога спастися душам нашим.

НА УТРЕНИ

На Бог Господь: тропарь святому. Слава, и ныне, Богородичен.

По первом стихословии, седален, глас 8:

Премудростию Слова обогатев, / источил еси учения реки спасительнаго, / и тем благочестивых души напоил еси; / палицею же Божественнаго разума упасл еси стадо твое. / Темже, яко пастыря и учителя велика, восхваляем тя, Иоанне; / моли Христа Бога, грехов оставление подати / чтущим святую память твою.

Слава, и ныне, Богородичен:

О Пречудная Дево Богородице, / Огнь Божества во чреве Твоем прияла еси, / и яко Младенца млеко́м питала еси Зиждителя и Господа. / Тем достойно славим пречистое рождество Твое, и согласно вопием Ти: / моли Христа Бога грехов оставление даровати, / воспевающим достойно славу Твою.

По втором стихословии, седален, глас 5:

Плоды Богоразумия возделав труды своими, Иоанне блаженне, / услышал еси словеса тайных учений, / иноком же и миряном образ жития

явился еси/ и, страсти вся крепко поправ, ко Господу преставился еси;/ Его же моли даровати нам велию милость.

Слава, и ныне, Богородичен:

Жезл из корене Иессеова/ возрастѣла еси, Дево, Христа Бога;/ Егоже моли, Пречистая, с блаженным святителем Иоанном,/ даровати спасение душам нашим и велию милость.

По полиелеи, седален, глас 4:

Постом и молитвою, кротостию и смирением,/ терпением и благотворением Небесная обетованія улучил еси, Иоанне святителю блаженне./ Тем твой святой и светоносный день верою совершающе, благочестно вопием:/ яко имея дерзновение ко Господу, моли спастися нам.

Слава, и ныне, Богородичен:

Обновила еси, Пречистая,/ Божественным рождеством Твоим растлевшее страстьми естество наше/ и всем путь к блаженному безстрастию и чистоте открыла еси;/ темже вси по долгу Тя ублажаем, Дево Преславная.

Степенна 4-го гласа. Антифон 1. Прокимен: Честна пред Господем смерть преподобных Его. **Стих:** Что воздам Господеву о всех, яже воздаде ми. **Всякое дыхание:** Евангелие от Луки, зачало 24. По 50-м псалме, стихира, глас 6: Днесь любовь сошедшея: писана на велицей вечерни.

Канон Богородицы с ирмосом, на 6, глас 8: Многими содержим напастьми: **И святителю на 8, емуже краегранесие:** Тя, Богомудраго святителя, молебно пою.

Канон святителю, глас 6.

Песнь 1

Ирмос: Яко по сѹху пешешествовав Израиль,/ по бездне стопами,/ гонителя фараона/ видя потопляема,/ Богу победную песнь/ поим, вопияше.

Твою священную творящим память, святителю Иоанне,/ даровати согрешений оставление, жития исправление и Небеснаго Царствия наследие,/ не престай молити Христа Бога.

Яко отец милосерд к сирым был еси,/ вдовиц же питатель, скорбящим утешитель, обидимым заступник,/ граду Суждалю пастырь и хранитель, святителю Иоанне./ Темже и ныне прилеж-

но молися Владыце Христу о чтущих память твою.

Божественным осияемъ светом/ и со Ангелы ныне на Небесех водворяяся,/ поминай верою чтущих память твою, святителю Иоанне приснопамятне.

Богородичен:

Око сердца моего устремляю к Тебе, Чистая,/ не презри теплое к Тебе воздыхание,/ и буди ми покров и Помощница.

Песнь 3

Ирмос: Нестъ свят,/ якоже Ты, Господи Боже мой,/ вознесый рог верных Твоих, Блаже,/ и утвердивый нас на камени/ исповедания Твоего.

Горько стенья припадаем ти, святителю, грешнии раби твои:/ молися о нас ко Христу Богу помиловати рабы твоя,/ да не хвалится враг, видя нас погибающих.

Образ Божий сохраняя невредимым, преподобне,/ чистотою и смиренномудрием украсился еси,/ житие же нескверно и нрав милостивен стяжал еси, досточудне.

Мудростию и добродетелию украсив житие свое,/ великое дерзновение стяжал еси ко Господу;/ темже молитвами твоими сохраняй град и люди от всякия беды и нужды.

Богородичен:

Умная вся чиноначалия превозшла еси, Пречистая,/ яко Единого от Пресвятыя Троицы родила еси нам Спасителя и Господа,/ Егоже моли, Приснодево, спастися душам нашим.

Ин кондак, глас 8:

Незаходимое солнце возсия днесь / преславная память твоя, святителю Христов Иоанне,/ созывающе нас к похвалению Христа Бога нашего./ Темже, притекающе к тебе, исцеления дары приемлем / молитвами твоими.

Ин икос:

Преподобне и всеблаженне святителю Иоанне,/ поучився во дни и нощи в заповедех Господних,/ и сподобился еси обрести лествицу Небесную,/ еуже взыде на высоту Горняго Иерусалима./ Небесный человеке и земный

Ангеле, / светило неугасаемое всея Руси, / моли спастися граду твоему и людем любовию тя почитающим, / молитвами твоими.

Седален, глас 1:

Премудростию Слѡва обогатѣв, / источил еси учения реки живѡтны, / и тем благочестивых души напоил еси, / палицею же Божественнаго разума упасл еси стадо твое; / темже, яко пастыря и учителя велика, восхваляем тя, Иоанне, святителю блаженне. / Моли Христа Бога грехов оставление даровати / чтущим святую память твою.

Слава, и ныне, Богородичен:

О Пречудная Дево Богородице, / Огнь Божества во чреве Твоем прияла еси, / и яко Младенца млекѡм питала еси Зиждителя и Господа. / Темже достойно славим пречестное Рождество Твое, и согласно вопием Ти: / моли Христа Бога, согрешений оставление даровати воспевающим достойно славу Твою.

Песнь 4

Ирмос: Христос моя сила, / Бог и Господь, / Честная Церковь / Боголепно поет, взывающи, / от смысла чиста о Господе празднующи.

Духом уныния одержимъ, / к тебе очи сердца моего возвожѹ, / Иоанне святителю, / и вопию ти прилежно: / молитвами твоими спаси душу мою погибающую, / и научи мя ко Христу взывати: / слава силе Твоей, Господи.

Разслаблен есмь волею, / слепотствѹю же разумом; / темже, святителю, молися ко Христу, / помиловати душу мою, / злыми недѹгами сими люте уязвленну.

Аз, яко кровоточивая, / тѡки нечистых помышлений источаю непрестанно, / яко хананея же, к тебе взываю: / святителю, молитвами твоими помози ми, / и исцели недѹги души моея, / моляся ко Христу Человеколюбцу.

Богородичен:

Господа Милосердаго нам рождшая, Пречистая, / не предаждь нас врагом нашим, / наша Заступница и наша надеждо, / но покрый нас ризою Своею.

Песнь 5

Ирмос: Божиим светом Твоим, Блаже, / утренюющих
 Ти души любовью озари, молюся, / Тя ведети, Слове
 Божий, / Истинного Бога, / от мрака греховного зыва-
 юща.

О Тебе радуется и веселится град Суждаль,
 святителю Иоанне, / веселится и радуется и храм
 Божия Матере, / имея тя светильника великаго, /
 нашего пастыря презряднаго.

Светило неугасимое, преподобне, угодниче
 Христов всечестне, / Суждалю слава и вся Рос-
 сии похвала; / моли спастися граду твоему / от
 всяких бед и скорбей.

Возсияв, яко солнце, в стране нашей, / люди
 твоя учени твоими просветил еси, блажен-
 не; / темже тя почитаем яко Божественнаго
 наставника / и Богомудраго учителя.

Богородичен:

Яко грешнейший всех, / на Небо взирати не
 смея, к Тебе прибегаю и вопию: / Мати Божия
 Пречистая, умилосердися на мя / и избави мя
 вечнаго осуждения.

Песнь 6

Ирмос: Житейское море, / воздвизаемое зря напастей
 бурю, / к тихому пристанищу Твоему притек, вопию Ти: /
 возведи от тли живот мой, / Многомилостиве.

Тя имуще тепла заступника раби твои, / да не
 будем посрамлени от наветов вражиих, / но да
 побеждаем их, / молитвами твоими укрепляеми.

Избави от внезапныя смерти люди твоя, бла-
 женне Иоанне, / страсти угаси, беды отврати, / и
 всякую скорбь и лишение отжени / молитвами
 твоими.

Терпение твердое, и благодушие невоз-
 мущенное / явил еси, блаженне Иоанне, / клевето-
 ю и злобою изгнан быв из града; / яже отврати
 от нас молитвами твоими, / да радостно воспева-
 ем тя.

Богородичен:

Едино предстательство верных, / и обурева-
 емых отиши, Дево Богородице, / страстей моих
 непостоянную бурю утиши, / и из бездны грехов-
 ной исхити мя, / молитвами Твоими, Пречистая.

Кондак, глас 8:

Богомудрым учением и святым житием, / яко светильник, сиял еси в Церкви Божией; / темже Божественнаго заступления сподобился еси, / внигда ослѣпнути очесѣм злоумышленных клеветников твоих, / ихже прозрѣти сотворив молитвою твоею, / вспять возвратился еси во град твой, / и добре упасл еси стадо словесных овец; / ихже чадом помогай и нам, молитвами твоими, / святителю Христов Иоанне.

Икос:

Преподобне всеблаженне святителю Иоанне, / кто, слыша мудрыя речи твоя, не умилися от сладости словес твоих; / или кто, зря светолѣпное лице твое, благоговения не исполнися; / или кто, видя святое житие твое, не покаялся; / или кто, сребролюбив сый, видя нищету твою, Христа ради обнищати не возжелá; / или кто, гордостию превозносяся, видя смирение твое, нищ духом не соделася; / или кто, гневлив и напраслив сый, тихостию нрава твоего на кротость не преложися; / темже священную память твою празднующе, молимся тебе: / заповеди Божия исполнити нам помоги, / и в Царствие вечное приведи молитвами твоими.

Песнь 7

Ирмос: Росодательну убо пещь / содела Ангел / преподобным отроком, / халдеи же опаляющее веление Божие мучителя увеща вопити: / благословен еси, Боже отец наших.

Любовию влекóми, взываем ти, святителю Христов: / буди нам скорый помощник, / избави нас от всякаго зла, и от всяких бед соблюди.

Яко скоропослушнаго предстателя нашего / молим тя, святителю Христов, / от всякия брани страстѣй, востания плоти / и всех наветов вражеских свободи нас, вопиющих ти: / радуися, отче треблаженне.

Моли, святителю Иоанне, / от бед избавитися, любовию тя почитающим, / и научи вопити: / благословен Бог отец наших.

Богородичен:

Ограждение напáствуемых, утешение скорбящих,/ спасение бедствующих, Богородице всехвáльная,/ моли Сына Твоего и Бога, избáвиться нам от бед и зол.

Песнь 8

Ирмос: Из пламене преподобным рóсу источíл еси,/ и праведнаго жертву водою попалíл еси;/ вся бо творíши, Христе, тóкмо еже хотети./ Тя превозносим во вся веки.

Людeм твоим, прибегающим к покрову твоему, Иоанне всехвáльне,/ моли спастися от искушений молитвами твоими.

Еже ко Господу восхождение в сердце твоem полагáя, о душé,/ возопíй к Человеколюбцу:/ Спасе, помилуй мя окаяннаго,/ молитвами святителя Твоего.

Боюся Суда Стрáшнаго и огня геенскаго;/ но виждь сокрушение сердца моего, святителю,/ и испроси мне прощение безмерных моих прегрешений.

Богородичен:

Ночь греховная покрýла мя есть:/ но озари мя, Человеколюбче, молитвами Пречистыя Твоя Матере,/ и спаси мя.

Песнь 9

Ирмос: Бога/ человеком невозможно вíдети,/ на Негоже не смеют чíни Ангельстии взирати;/ Тобою бо, Всечистая, явися человеком/ Слово Воплощённо,/ Егоже величающе,/ с Небесными вои/ Тя ублажаем.

Отцу, и Сыну, и Святому Духу/ дóбре послужíв во плоти, святителю Иоанне,/ Пресúщныя Троицы предстояти Престолу с Безплотными сподóбился еси;/ идеже Христа Бога моли, просветити души наша омрачénныя.

Поем твою священную память, святителю Иоанне,/ и, благонадéжно к тебе прибегая, вопием:/ спаси нас заступлением твоим.

О пречúдный святителю Христов Иоанне,/ святительским житием украсíлся еси;/ и ныне на Небесех вселился еси,/ идеже ликуют Ангели, светом Божéственным осиявáеми.

Богородичен:

Юже иногда Иаков вíде чúдную лествицу, от земли простёрту к Небесной высотé,/ исповедуем

Тя, Пречистая Богородице:/ Тобою бо Небесная земным, и земная Небесным совокупѣшася.

Светилен, глас 2:

На Небесех ныне со Ангелы водворяяся,/ во свете Присносущныя Троицы, святителю отче Иоанне,/ о нас молися Человеколюбцу Богу,/ сохранитися нам от сети лукаваго.

Слава, и ныне, Богородичен:

Сподоби, нас, Пречистая,/ Твоими молитвами избавитися от всех напáстей,/ яко к Тебе прибегаем, и ангельски вопием Ти:/ радуйся, Богоблагодатная Пречистая.

На хвалитех стихиры, глас 1, писаны на малой вечерни. Слава, глас 8: Образ благочестия; писан на малой вечерни.

На Литургии: Блаженны от канона, песни 3 и 6. Прокимен, Апостол святителю общий, зачало 318. Евангелие от Иоанна, зачало 36. Причастен: В память вечную будет праведник, от слуха зла не убоится.

Молитва

святителю Христову Иоанну,
епископу Суждальскому, чудотворцу

О святыи великий архиерею Божий Иоанне чудотворче, угодниче Христов и заступниче нам теплый, граду Суждалю и всей Россiйстей стране похвало и утверждение, церковная красота, сирым отец, вдовам теплый заступник, скорбящим утешение, болящим исцеление, Православию наставник, благочестию учитель и чистоте, заповедей апостольских и отеческих верный хранитель, стада словесных овец бодренный блюститель, и всем христолюбивым людем скорый предстатель! Помилуй нас, и услыши в час сей моление наше, и помяни нас у Престола Владыки Христа Царя, и помолися о нас, яко да избавит нас от всех бед, и зол, и от всякия неправды, души наша да очистит от всякия скверны греховныя, ум да просветит ведением судѣб Своих, сердце же да утвердит во всякой добродетели, и тако сотворит нас наследниками Царствия Своего Небеснаго; яко да твоим заступлением и помощию спасаеми, славу, хвалу, благодарение и поклонение возсылаем Отцу, и Сыну, и Святому Духу, ныне и присно, и во веки веков. Аминь.

В
ТОЙЖЕ
ДЕНЬ



**Преподобнаго Лукиана священномученика,
в Дальних пещерах почивающаго**

Тропарь, глас 4:

Подобен: Вознесыйся на Крест:

И нравом причастник, и престолом наместник
апостолом быв, / деяние обрел еси, Богодухновен-
не, в видения восход. / Сего ради, Слово Истины
исправляя, / и веры ради пострадал еси даже до
крове, / священномучениче Лукиане, / моли Хри-
ста́ Бóга спастися душам нашим.

Кондак, глас 4:

Во священстве и иночестве благочестно
пожив / и мучения путь прошед, / мучителя и
бесовская полчища посрамил еси, / темже, почи-
тающе тя, тако вопием ти: / от бед избави ны
присно твоими мольбами, отче наш Лукиане.

